

est, et nostrum credere. Nec statim, si nos non credimus, impossibilis Deus est, sed potentiam suam nostro arbitrio derelinquit, ut juste voluntas premium consequatur. Quia ergo noluerant per me in te credere, judicium meum apud te est, quod onnia fecerim quæ eis facere debui. In quo testimonio, et fere in omnibus quæ in hac materia attinguntur, observare licet, semper conjungere Patres libertatem cum sufficientia gratiæ, quæ includat omnia quæ Deum facere oportet, ita ut ea sint in hominis potestate, cum qua sit etiam potestas non utendi tali gratia; hæc enim omnia complexus est Hieronymus illis verbis, si attente considerentur. Optima item sunt illa verba de Eccles. dogmat., c. 21: *Manet utique ad quærendam salutem arbitrii libertas, id est rationalis voluntas, sed admonente prius Deo, et invitante ad salutem, ut vel eligat, vel sequatur, vel agat occasione salutis, hoc est, inspiratione Dei;* et infra: *Initium ergo salutis nostræ, Deo miserante, habemus; ut acquiescamus salutisferæ inspirationi, nostræ potestatis est;* et infra: *Sicut initium salutis nostræ, Deo miserante et inspirante habere nos credimus, ita arbitrium naturæ nostræ sequax esse divinæ inspirationis, libere confitemur.* Oportet autem hoc loco advertere hanc sententiam notasse Pelagiani erroris Joannem Montiniensem, in epist. ad Lectorem, quam affixit operibus Prospere, et inter alias conjecturas illam adducit, ut Gennadium suspectum reddat Pelagianæ haereseos. Sed, quidquid sit de Gennadio, immerito locum illum notat, et receptissimo operi de Ecclesiasticis dogmatibus plurimum detrahit. Primo quidem, quia nee Magist. sent., nec D. Thomas, neque Theologorum ullus suspicionem aut vestigium talis erroris in eo opere invenerunt. Secundo, quia ab illo cap. 21, usque ad 29, expresse damnantur omnes errores Pelagii, eisdem fere verbis quibus et summi Pontifices, et Concilia Africana, et Augustinus uti solent. Quod cum ille auctor negare non potuerit, ait ea capita, præsertim 22 et 29, non esse ejusdem auctoris, sed ab aliquo alio supposita esse ad corrigendam illam sententiam capit. 21. Sed hoc et gratis et temere dictum est, quia nullum est rei illius fundamentum neque vestigium; et, si aliquid hujusmodi conjectandum erat, facilius et verisimilius diceretur unum caput vigesimum primum esse suppositum, quam octo subsequentia. Ad hæc quidnam est erroris in illo cap. 21? Numquid quod ait, mansisse in nobis arbitrii li-

bertatem ad sequendam inspirationem divinam, vel quærendam salutem, admonente prius Deo? At hoc non solum non est hæreticum, verum etiam est de fide certum, ut constat. Aut est error in hoc quod soli libero arbitrio ejusque viribus tribuat sequi inspirationem divinam, et eligere salutem, inspirationem supposita? At hic error falso imponitur auctori illius libri; nunquam enim addit particularum exclusivam, neque divinum adjutorium disjungit a libero arbitrio; imo eodem cap. 21, ait: *Ut non labamur in adepto salutis munere, sollicitudinis nostræ est, et caelensis pariter adjutorii; ut labamur, potestatis nostræ est et ignavia; non tamen ad obtinendam sine illo, qui querentes facit invenire, qui pulsantibus aperit, qui potentibus donat.*

Ultimo similes sententiae sunt frequentes apud D. Augustinum; quid enim aliud continet illa sententia Augustini, l. 1 ad Simplicianum, q. 2: *Ut relimus, suum voluit esse et nostrum, suu vocando, et nostrum sequendo;* et de Spirit. et litt., cap. 33: *Negre istam voluntatem, qua credit Deo, dici potest homo habere, quam non accepit; quandoquidem vocante Deo surgit de libero arbitrio, quod naturaliter cum crearetur accepit; quod idem repetit c. 34, et addit: In omnibus misericordia ejus prævenit nos; consentire autem vocationi Dei, vel ab ea dissentire, sicut dixi, propriæ voluntatis est.* Quibus locis nullam mentionem facit gratiæ adjuvantis, non quia illam excludat, sed quia necesse non est in singulis locis omnia dicere. In Enrichid. autem, cap. 32, similem repetens sententiam, gratiam adjuvantem expresse adjunxit; et alia plura testimonia similia videbimus in sequentibus.

Præterea valde notanda sunt verba Prospere, 2 de Vocab. Gent., c. 9, alias 26, ubi cum eleganter excitantem gratiam descripsisset, *qua Deus cor illuminat, et fidei affectionibus imbuvit,* subdit: *Sed etiam voluntas hominis subjungitur ei, atque conjungitur, quæ ad hoc prædictis est excitata præsidiis, ut divino in se cooperetur operi, et incipiat exercere ad meritum, quod superno semine concepit ad studium, de sua habens mutabilitate si deficit, de gratiæ opitulatione si proficit.* *Quæ opitulatio per innumeros modos, sive occultos, sive manifestos, omnibus adhibetur, et quod a multis refutatur, ipsorum est negavit;* *quod autem a multis suscipitur, et gratiæ est divinæ, et voluntatis humanae.* Quod postea late prosequitur, docens (id quod in doctrina Augustini est frequentissimum) Deum per hanc gratiam excitantem

non determinare, sed præparare voluntatem, ut ipsa tandem consentiat, et consentiendo se determinet, cum gratia nimis coadjuvante et cooperante. Et eamdem doctrinam habent late Bernardus, Fulgentius, Petrus Diaconus, et alii, qui post Augustinum de gratia et libero arbitrio scripserunt. Antiquiores autem idem sensisse multo magis indubitatum est, præsertim Græcos.

Insignis est locus ille apud Gregorium Nazianzenum, orat. 31, ubi tractans illud Pauli: *Non est volentis, neque currentis, ita exponit, id est, non solum volentis, neque currentis solum, quia, licet ipsum velle nostrum sit, non tamen sine Deo opitulante et adjuvante, et principaliter operante. Quam expositionem Augustinus interdum rejicit, ea ratione, quia, juxta illum sensum, etiam possemus dicere: Non est Dei miserentis, sed hominis volentis.* Ad hoc tamen responderet Nazianzenus, non esse parem rationem, quia licet homo aliquid conferat ac operetur, cum bene vult et currit, Deus tamen est qui principales partes confert, propter quod ejus misericordia et velle et concurre hominis attribuitur. Sic fere respondet Chrysostomus, hom. 12 ad Hebr., ubi, cum illam celebrem protulisset sententiam: *Nostras non antecedit voluntates, ne liberum lœdatur arbitrium, tali nimis antecedente gratia, que ipsum physice prædeterminet, subiungit: Hoc modo ergo Paulus inquit: Non est volentis, neque currentis, etc., et in summa respondet: Quia cuius est amplius, totum esse dixit; nostrum enim eligere est et velle, Dei autem est efficere et ad perfectionem perducere; quia ergo ejus est quod amplius est, ejus dixit esse universum;* quod deinde subiunctis exemplis declarat: *Nam cum videmus domum bene constructam, totum architecto attribuimus, quamvis operarii aliquid contulerint; et in multitudine, ubi sunt plurimi, omnes esse dicimus; ubi autem pauci, nullum. Sic ergo Paulus, ne in superbiam erigamus, nostrum velle et currere in Deum resert, tanquam in principalem auctorem. Neque tamen Deus (inquit) totum suum esse voluit, ne rideatur sine causa nos coronare.* Quam Chrysostomi sententiam Theophylact., ad Rom. 9, imitatur; imo Augustinus, l. Quæst. in Exod., q. 167, tractans illa verba Exod. 34: *Hæc sunt verba quæ dixit Dominus facere,* et dubitans an illud verbum facere, ad Deum vel homines referendum sit, respondet: *Forte ideo sic positum est, ut ex utroque accipiatur; nam et homines facere debent cum ipsis jubeantur, et Deus facit cum facientes ad-*

juvat, secundum illud Apostoli: In timore et tremore vestram ipsorum salutem operamini, Deus est enim qui operatur in nobis et velle et perficere; et de Spir. et litt., c. 2: Cogitare (inquit) debes, quamvis ad hominem id agere pertineat, hoc quoque munus et opus esse divinum, etc.; et cap. trigesimo quarto (ut jam retuli), apertius dicit Deum operari velle in nobis per gratiam excitantem, sed, ei consentire vel dissentire, propriæ voluntatis esse: Quæ res (inquit) non solum non infirmat quod dictum est: Quid habes quod non acceperisti, verum etiam confirmat; accipere quippe et habere anima non potest dona de quibus hoc audit, nisi consentiendo; ac per hoc quid habeat et quid accipiat Dei est; accipere autem et habere, utique accipientis et habentis est. (Legatur Augustinus, 1 de Gratia Christi, 5, 10 et 23.) Itaque, licet inter hos Patres nonnulla sit diversitas in exponendis illis verbis Pauli: *Non est volentis, etc., quæ non magni momenti est, tamen in re de qua tractamus est magna consensio, quod nimis Deus ita voluntates nostras excitat aut adjuvat, ut libera determinationem eis relinquat, quamvis non sine ejus concurso et adjutorio. Quod etiam egregie declaravit Cyrus Alexandrinus, lib. 4 in Joannem, cap. 7, circa illa verba: Omnis qui audit a Patre, etc.: Ubi auditus (inquit) disciplina doctrinaque adest, ibi fides non ri, sed persuasione oritur, patrocinio igitur Dei Patris, quod ex charitate dignis præstatur, non ri Christum fideles agnoscent, ubi totum negotium gratiæ excitantis persuationem appellavit; per vim autem, omnem extrinsecam motionem intelligit, quæ libertatis usum impedire possit, ideo enim subiungit: Non enim possumus secundum Ecclesiæ veritatisque dogmata liberam potestatem hominis ullo modo negare.* Simili modo Chrysostomus, hom. 26 in Joannem, ad finem, ait non cogere nos Deum vocatione sua, quia non est violenta, sed suatoria, salutem relinquens in nostro arbitrio. Eodem pacto Clemens Alexandrinus libro secundo Strom., p. 34, dicit in homine esse obtemperare vel non obtemperare vocationi. Et Evodius, epistol. ad Constantium, apud Turrian., lib. 4 contra Magdeburgenses, cap. 2: *Gratiæ (inquit) est quod vocamus, quodque occultis itineribus, nisi resistamus, sapor nobis vitalis infunditur.* Similia sumuntur ex Theophylacto in id Joan. 7: *Quo ibimus, verba vita æternæ habes. Sed ex Patribus nunc haec sufficient, plura enim cap. 12 et 13 afferemus.*

8. *Ratione denique probatur.* — Ratione tandem in hunc modum potest hæc veritas declarari et confirmari, nam gratia excitans (ut supra visum est) non movet hominem ad consensum, nisi vel illuminando intellectum, qua ex parte tota hæc motio reducitur ad objectum; vel afficiendo aut terrendo affectum per imperfectos quosdam et indeliberatos motus timoris, affectionis vel gaudii; sed neuter ex his modis movendi voluntatem sufficiens est ad illam physice determinandam; ergo gratia excitans non determinat physice voluntatem. Minor, quoad priorem partem, per se constat; quia extra visionem beatificam, nullum particulare objectum determinat voluntatem, præsertim quoad exercitium actus; imo etiam auctores contrariae sententiae in hoc fere solo constituent libertatem voluntatis, quod ab objecto non determinetur, ut libro primo, in principio, vidimus. Item objec- tum supernaturale fide propositum non determinat voluntatem; ergo propositum per alias illuminationes, vel excitaciones, quæ non sunt fide perfectiores, non poterit determinare voluntatem. Denique in superioribus ostendimus judicium intellectus non habere vim determinandi physice voluntatem, nisi in vi alterius liberi actus, ex quo alter necessario sequitur; sed illuminatio gratiæ excitantis, de qua nunc loquimur, non supponit actum liberum, sed prævenit hominis libertatem; ergo non potest physice determinare voluntatem ad consensum. Quoad alteram vero partem, probatur facile eadem minor, quia illi motus gratiæ excitantis, qui in voluntate oriuntur seu inspirantur, in suo ordine sunt imperfecti, et simplices quidam affectus seu velleitates quædam; ergo ex intrinseca illorum vi non potest voluntas physice determinari ad plenum et absolutum consensum præstandum; nam voluntas ex vi unius actus non determinatur ad alium, nisi quando habent inter se necessariam connexionem, ut est inter electionem unici medi, et efficacem intentionem finis; at vero efficax et absoluta voluntas non habet hujusmodi connexionem cum simplici et imperfecta velleitate. Imo, si talis connexionem necessaria ibi intercederet, cum motus gratiæ excitantis non sit liber, sed necessarius, etiam consensus qui cum illo es- set necessario conjunctus, non esset liber, sed simpliciter necessarius. Non est ergo unde sola gratia excitans ex se possit voluntatem physice determinare.

CAPUT X.

AN POSSIT GRATIA EXCITANS SALTEM MORALITER VOLUNTATEM DETERMINARE.

1. *Quid sit moralis determinatio.* — Sed antequam ulterius progrediamur, querendum obiter hic est, an gratia excitans saltem moraliter determinet voluntatem, de quo multa dici possent; sed quia per se ad nostrum institutum non spectat, breviter expediri potest, quantum præsenti instituto sufficit. Igitur determinatio moralis in hoc a physica differt, quod veram et realem potentiam relinquit ad resistendum tali determinationi, id est, ad aliter operandum quam ea determinatio inclinet; ideo enim moralis dicitur, quia nulla causalitate physica, quæ potentiam ad oppositum omnino superet et vincat, ad alteram partem voluntatem coarctat, sed solum morali modo inducit persuasionem vel affectionem quadam. Unde cum determinatio moralis dicitur, conditio additur diminuens, quia illa revera absolute non est determinatio, sed potest esse vehemens quædam propensio, quæ vel frequentius, vel forte semper perducitur ad effectum, et ideo moralis determinatio vocatur; sicut etiam solet dici moraliter impossibile quod est valde difficile, quamvis simpliciter et absolute impossible non sit. Ex qua vocis declaratione constat determinationem hanc moralem, etiamsi præveniat seu antecedat usum liberum, non impedire libertatem, in quo multum differt a prædeterminatione physica: hæc enim non relinquit potentiam ad oppositum, compositione facta, quia, cum sit ex suppositione prorsus antecedente et causali, repugnat libertati; illa vero, cum absolute relinquit potentiam ad oppositum, etiam compositione facta, non est cur libertati repugnet, ut constat ex doctrina Concilii Tridentini sœpe citata.

2. *Prædeterminationis moralis per gratiam excitantem necessaria non est ad supernaturaliter operandum.* — Dicendum est ergo hujusmodi prædeterminationem moralem voluntatis, simpliciter loquendo, fieri posse per excitantem gratiam, quamquam necessaria non sit ad liberum consensum, seu supernaturalem actum humanum efficiendum. Hæc posterior pars eodem modo probanda est, quo præcedenti capite ostendimus determinationem physicam non esse necessariam, scilicet, quia

CAP. X. AN POSSIT GRATIA EXCITANS SALTEM MORALITER, ETC.

193

alias nulla gratia excitans, quæ non efficeret in homine hanc moralem determinationem, esset in suo ordine auxilium sufficiens ad conversionem vel actum supernaturalem efficiendum. Sequela patet, quia illa gratia excitans dicitur sufficiens, quæ in suo ordine satis est ad effectum ad quem sufficere dicitur; hoc enim ipsa vox sufficientis significat: si ergo major excitatio necessaria est, illa quæ minor fuerit, non poterit vere appellari auxilium sufficiens in ratione gratiæ excitantis. Constat autem, cæteris paribus, seu respectu ejusdem, majorem seu vehementiorem excitationem requiri ad determinandam moraliter voluntatem, quam ad movendam et inclinandam illam absque tali determinatione; ergo, si excitatio moraliter determinans necessaria est, omnis alia minor, quæ non fuerit sufficiens ad prædeterminationem moraliter voluntatem, non erit etiam sufficiens ad conversionem ejus; consequens autem est plane falsum; alioqui, vel nullus, vel certe paucissimi ex his qui sufficenter excitantur ut credant, vel poenitentiam agant, repugnare vocationi. Vel e contrario, moraliter loquendo, seu secundum id quod frequentius accedit, omnes, qui de facto non credunt vel non consentiunt, quando vocantur, non sufficenter vocantur, quod nullus Catholicus audebit concedere; quia alias paucissimi, aut fere nullus, peccarent non credendo, aut poenitentiam non agendo, ut constat ex superius dictis de gratia sufficiente. Utraque autem illatio in hoc fundatur, quod voluntas moraliter prædeterminata ad consensum, aut nunquam, aut vix et raro dissentit, quamvis possit; hoc autem principium constat ex ipsa voce et definitione moralis prædeterminationis. Non enim dicitur prædeterminationis ad unum, quia tollat potentiam ad oppositum; sed quia ita movet et inclinat, ut regulariter ac fere semper voluntatis consensus illam sequatur; ergo, posita hac prædeterminatione, etiam respectu actuum supernaturalem, regulariter aut fere semper fiunt; ergo, si illa est simpliciter necessaria ad supernaturalem actum, cum regulariter homines illam non habeant, neque habere possint, regulariter etiam non habebunt auxilium sufficiens.

3. *Refellitur quædam evasio.* — Respondent aliqui, sicut hec determinatio non est physica, sed moralis, ita esse necessariam ad actum supernaturalem, non necessitate physica et simpliciter, sed morali; atque ita posse